



Anne-Lise Bjørke Monsen
Blaauws vei 8
5022 BERGEN

OM KLAGE PÅ UREINING FRÅ OPPDRETTSANLEGG PÅ LOKALITETEN STUALAND I ÅLFJORDEN I SVEIO KOMMUNE

Me viser til klage sett fram i vedlegg til e-brev 23. september 2020. Dei som hadde skrive under brevet i lag med deg får kopi av dette brevet. Brevet var òg sendt til Fylkesmannen i Vestland og Miljødirektoratet. Fylkesmannen får kopi av brevet. Me viser òg til video du sende per e-post 30. september. Den er sterke dokumentasjonen og ligg ved her.

Me orsakar noko seint svar. I dag var kommunen sin sakshandsamar for ureiningssaker, Åshild Irene Lie, og underteikna på synfaring. Vedlagt er nokre foto frå synfaring. I dag var det regnbyger og om lag 8 grader Celsius. I Bulvik var det heilt stille og sjølv på ein gråvårsdag som i dag er det ikkje vanskeleg å sjå for seg at Bulvik er ein fantastisk flott plass. Akvakulturanlegget med ringar/merdar og fôrflåte låg stille eit stykke utpå sjøen, tydelegvis utan drift for tida. I dag var det noko flo og i fleire veker har det vore mykje nedbør og periodar med sterk vind. Såleis var det ikkje overraskande at me i dag ikkje fann spor av ureining som me kunne sjå med berre augo. Vegetasjonen i stranda såg normal ut, og den og sjøvatnet lukta friskt av sjø.

I brevet dykkar vert det nemnd at det har vore ulik ureining som skum, slintrer og oljespeil. Det vert vidare lista opp kor mykje fiskefôr som vert nytta, kor mykje fisk det vert produsert og det er estimert kor mykje feces og spillfôr det kan vera under merdane. Det vert òg vist til MOM-C-undersøking for Stualand frå 2020 og til dårleg resultat for total organisk karbon, koparmengde og botnfauna.

Vidare vert det referert frå Havforskingsinstituttet sin rapport «Risikorapport norsk fiskeoppdrett 2019 – Miljøeffekter av lakseoppdrett», datert 24. juni 2020.

Til slutt i brevet vert det peika på at sjølv om drifta skulle stoppa opp, vil det ta lang tid før organiske stoff vert brotne ned, at organiske miljøgifter vil vera i området lenge og at toksiske tungmetall vil ligga i fjorden til evig tid. De ber kommunen undersøkja kva ureininga består av, kor den kjem frå og korleis den kan stoppast.

Kommunen er ikkje i tvil om at det er rett som det vert skildra i brevet at sjøen i periodar er tilgrisa og uhygienisk, og at dette fører til at de opplever store ulemper. Nemnde video viser i nokon grad dette. Kommunen delar oppfatninga dykkar av at det er ganske sannsynleg at det er fiskeoppdrettet som er årsaka. Nemnde rapport frå Havforskingsinstituttet støttar dette. Det same gjer MOM-C-undersøkingar. Sjøkart viser at djupna er ikring 100-150 meter der anlegget ligg. Ålfjorden er elles ein relativt smal fjord, anlegget på Stualand ligg om lag halvveis inne i fjorden og det er grunn til å tru at fjorden ikkje er så god recipient som opnare fjordar og område som er eksponerte meir mot havet. Det er ikkje usannsynleg at sjøen si sølvreinsing av feces og fôrrestar er såpass svak at det samlar seg opp under anlegget og at ureining herfrå kan koma til sjøoverflata og til strandene omkring. Det bør elles nemnast at selskapet som driv på lokaliteten har søkt om flytting, men at styremaktene ikkje har opna for dette på grunn av manglande avklaring i arealplan.

Når ureininga ganske sikkert er knytt til akvakultur, meiner kommunen at det er fylkesmannen som er ureiningsstyresmakt. Elles er det krav til akvakulturselskap at dei sjølve skal granska blant anna kva fylgjer

drifta har for botnforholda på lokaliteten . Dette er i samsvar med prinsippet om at den som ureinar sjølv skal bera ansvaret. Kommunen har ikkje noko rolle i denne samanheng.

Me skulle ynskja me hadde rokke å fara på synfaring tidlegare i den godværperioden som var rett etter klaga kom. Diverre rakk me ikkje det, og den tilgrisinga som måtte ha vore vart nok seinare borte med vind, sjøgang og nedbør.

Me har forståing for situasjonen dykkar. Alle, medrekna akvakulturverksemndene, ynskjer nok mest mogleg rein sjø. Kunnskapsgrunnlaget kunne vore betre og var nok svakare tidlegare når mange etableringar av akvakulturanlegg vart gjort. Me kan håpa at betre kunnskapsgrunnlag og betre driftsmetodar etter kvart kan minska spora akvakulturen set i naturmiljøet. Ved god planlegging er det òg ei målsetjing å plassera akvakulturanlegga der dei set minst spor og å minska påverknaden på naturmiljøet mest mogleg.

Med helsing

Geir Ragnhildstveit
seniorrådgjevar

Dokumentet er godkjent elektronisk.

Kopi til:

Fylkesmannen i Vestland	Njøsavegen 2	6863	LEIKANGER
Grete Hersvik Larsen	Rogalandgata 206	5518	HAUGESUND
Guttorm Lysvold Jenssen	Blaauws vei 8	5022	BERGEN
Jens Christian Larsen	Rogalandgata 206	5518	HAUGESUND

Vedlegg:

UREINING GNR 112 BNR 3 BULVIKEN - Foto tekne onsdag 4. november 2020

Video